

SAC ta sera oficialmente Carnaval 2002

Programa tentativo di Carnaval 2003 ta wordo anuncia



ORANJESTAD – Directiva y miembran di Stichting Arubanse Carnaval, SAC a tene siman pasa un evento festivo na Alhambra Casino. E evento aki tabatin dobel proposito. Na prome lugar a haci entrega di plakaat y premio na e diferente participantenan di Carnaval 48 cu a destaca den un ke otro categoria. Tambe a anuncia publicamente e programa oficial tentativo pa e proximo temporada cu lo ta Carnaval 49.

Entre esnan cu a ricibi un reconocimiento special Diadomingo anochi ta inclui e diferente Reina, ganadornan di festival y Prins y Panchonan di Carnaval 2002.



E trabao di Tecla Kelly y SAC no a caba, pero lo sigui cu e preparacion pa proximo aña. Semper ta haci esaki pa haci e proximo temporada ainda mas exitoso cu esun prome.

Teniendo esey na cuenta a duna di conoce e programa di aña 2003 cu lo cuminsa cu e Kick Off Party dia 17 di Januari y lo yega su climax cu e Gran Parada di Carnaval dia 2 di Maart 2003. Asina por ripara cu pa otro aña e Carnavalistanan di Aruba y bishitantenan di rond mundo lo tin hopi mas tempo pa goza di e dushi bacanal cu ta nos Carnaval.

Ta spera cu mescos cu SAC e diferente gruponan di Carnaval, musico y tur otro elemento importante den e fiesta aki lo sa di prepara debidamente pa eleva e calidad di nos Carnaval cu pronto lo ta celebrando su aniversario di oro.

Ata'ki algun di e fechanan importante di nos Carnaval 2003:

- 24 di Januari 2003 – Festival di Tumba
- 1 di Februari 2003 – Festival di Calypso & Roadmarch
- 7 di Februari 2003 – Eleccion di Sra. Carnaval
- 14 di Februari 2003 – Eleccion di Reina Infantil
- 16 di Februari 2003 – Parada di Mucha St. Nicolas
- 21 di Februari 2003 – Eleccion di Reina Hubenil
- 22 di Februari 2003 – Parada di Mucha na Noord
- 27 di Februari 2003 – Eleccion di Reina Grandi di Carnaval
- 1 di Maart 2003 – Jouvert Morning
- 2 di Maart 2003 – Parada Grandi di Carnaval
- 4 di Maart 2003 – Kimamento di Momo

